



Na osnovu člana 29. stav 1. tačka 1. Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, broj 39/03, 22/06 i 43/10), člana 28. Statuta Općine Ilidža („Službene novine Kantona Sarajevo“, broj: 33/10 i 18/16), Općinsko vijeće je na sjednici održanoj dana _____ donijelo

Prijedlog

ODLUKU

O ORGANIZOVANJU I FUNKCIONISANJU ZAŠTITE I SPAŠAVANJA LJUDI I MATERIJALNIH DOBARA OD PRIRODNIH I DRUGIH NESREĆA NA PODRUČJU OPĆINE ILIDŽA

I OSNOVNE ODREDBE

Član 1. (Predmet Odluke)

Ovom Odlukom reguliše se organizovanje i funkcionisanje zaštite i spašavanja ljudi i materijalnih dobara od prirodnih i drugih nesreća, način ostvarivanja prava i dužnosti građana i pravnih lica u zaštiti i spašavanju, nadležnosti organa vlasti općine Ilidže, strukture civilne zaštite, programiranje i planiranje, obučavanje i osposobljavanje i finansiranje civilne zaštite na području općine Ilidža (u daljem tekstu: Općina) u skladu sa Zakonom o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", broj 39/03, 22/06 i 43/10) - (u daljem tekstu: Zakon o zaštiti i spašavanju), Zakonom o nadležnostima organa vlasti Kantona Sarajevo u oblasti zaštite i spašavanja ljudi i materijalnih dobara od prirodnih i drugih nesreća ("Službene novine Kantona Sarajevo", broj 39/08, 9/11, 45/15 i 33/21), kao i odredbama ove Odluke.

Član 2. (Obim primjene Odluke u odnosu na subjekte)

Subjekti zaštite i spašavanja ljudi i materijalnih dobara od prirodnih i drugih nesreća su građani Općine; organi vlasti Općine; privredna društva i druga pravna lica sa područja Općine; službe zaštite i spašavanja; štabovi civilne zaštite; jedinice civilne zaštite i povjerenici civilne zaštite koji poslove zaštite i spašavanja ljudi i materijalnih dobara od prirodnih i drugih nesreća obavljaju u skladu sa odredbama federalnog i kantonalnog Zakona o zaštiti i spašavanju, provedbenim propisima donesenim na osnovu Zakona o zaštiti i spašavanju kao i odredbama ove Odluke.

II NAČIN OSTVARIVANJA PRAVA I DUŽNOSTI GRAĐANA I PRAVNIH LICA U ZAŠTITI I SPAŠAVANJU

Član 3. **(Lična i uzajamna zaštita građana)**

Lična i uzajamna zaštita građana predstavlja najvažniji oblik pripremanja i organizovanog učešća građana u zaštiti i spašavanju. Ta zaštita se provodi u stambenim zgradama, javnim i drugim objektima, naseljima i pravnim licima.

Lična i uzajamna zaštita obuhvata naročito: obuku građana, mjere i postupke preventivne zaštite, prvu pomoć, samopomoć, zbrinjavanje djece i nemoćnih lica i druge hitne intervencije u zaštiti i spašavanju ljudi i materijalnih dobara.

Ličnu i uzajamnu zaštitu provode građani gdje žive i rade u okviru prava i dužnosti utvrđenih Zakonom o zaštiti i spašavanju.

U zaštiti i spašavanju dužni su učestvovati svi radno sposobni građani od 18-60 godina života muškarci, odnosno 18-55 godina žene. Građanin koji je od nadležnog štaba civilne zaštite pozvan radi učešća u zaštiti i spašavanju dužan je odazvati se pozivu na mjesto i na vrijeme određeno u pozivu.

Član 4. **(Privredna društva i pravna lica)**

Privredna društva i druga pravna lica (u daljem tekstu: pravna lica) koja obavljaju djelatnost iz oblasti zdravstva, veterinarstva, stambenih i komunalnih poslova, vodoprivrede, šumarstva, poljoprivrede, rudarstva, građevinarstva, transporta, opskrbe, ugostiteljstva i vatrogastva u kojima se obavljaju djelatnosti od značaja za zaštitu i spašavanje ljudi i materijalnih dobara od prirodnih i drugih nesreća su dužna organizovati i sprovoditi poslove zaštite i spašavanja u skladu sa Zakonom o zaštiti i spašavanju, drugim propisima i ovom Odlukom.

U toku vođenja akcije zaštite i spašavanja ljudi i materijalnih dobara od prirodnih i drugih nesreća pravna lica iz stava (1) ovog člana su dužna provoditi odluke Općinskog štaba civilne zaštite.

Član 5. **(Obaveza pravnih lica)**

U izvršavanju poslova iz člana 4. ove Odluke pravna lica provode odgovarajuće pripreme, donose i razrađuju planove zaštite i spašavanja za svoje djelovanje u zaštiti i spašavanju, planiraju i osiguravaju materijalno-tehnička sredstva za provođenje mjera zaštite i spašavanja i organiziraju jedinice i povjerenike civilne zaštite, opremaju te jedinice i povjerenike potrebnom opremom i sredstvima i osposobljavaju ih za njihovo učešće u zaštiti i spašavanju. Pravna lica, vlasnici i korisnici telekomunikacijskih i informacijskih sistema i veza su dužna dati prioritet u korištenju tih sistema i veza Operativnom centru civilne zaštite i Općinskom štabu civilne zaštite Ilidže (u daljem tekstu: Općinski štab) kada rukovodi akcijama zaštite i spašavanja.

Član 6. **(Mjere zaštite i spašavanja)**

U cilju provođenja zaštite i spašavanja ljudi i materijalnih dobara od prirodnih i drugih nesreća na području općine Ilidža provode se sljedeće mjere: sklanjanje ljudi i materijalnih dobara, evakuacija, zbrinjavanje ugroženih i stradalih, zamračivanje, zaštita i spašavanje od radioloških, hemijskih i bioloških sredstava, zaštita i spašavanje od rušenja, zaštita i spašavanje na vodi i pod vodom, zaštita i spašavanje od požara, zaštita i spašavanje od neeksplodiranih ubojnih sredstava, prva medicinska pomoć, zaštita i spašavanje životinja i

namirnica životinjskog porijekla, asanacija terena, zaštita okoliša i zaštita bilja i biljnih proizvoda.

Član 7. **(Mjere i postupci nosioca zaštite i spašavanja)**

Mjere zaštite i spašavanja znače organizirane radnje i postupke preventivne i operativne prirode, koje pripremaju i provode organi uprave i drugi organi vlasti i pravna lica.

Organi uprave i drugi organi vlasti i pravna lica planiraju i pripremaju:

- 1) mjere i postupke od značaja za provođenje preventivne zaštite, kao osnovnog vida sprečavanja nastajanja prirodne ili druge nesreće ili ublažavanja njenog djelovanja;
- 2) mjere i postupke zaštite i spašavanja u slučaju postojanja neposredne opasnosti od nastanka prirodnih i drugih nesreća;
- 3) mjere i postupke zaštite i spašavanja tokom trajanja prirodnih i drugih nesreća;
- 4) mjere i postupke za ublažavanje i otklanjanje posljedica od prirodnih i drugih nesreća.

Mjere i postupci zaštite i spašavanja utvrđuju se planovima zaštite i spašavanja od prirodnih i drugih nesreća.

III NADLEŽNOSTI OPĆINSKIH ORGANA VLASTI

Član 8. **(Nadležnosti Općinskog vijeća)**

U ostvarivanju prava i dužnosti u oblasti zaštite i spašavanja, Općinsko vijeće Ilidža (u daljem tekstu: Vijeće) na prijedlog općinskog načelnika:

1. donosi Odluku o organizovanju i funkcionisanju zaštite i spašavanja ljudi i materijalnih dobara od prirodnih i drugih nesreća na području općine Ilidža
2. donosi Program razvoja zaštite i spašavanja od prirodnih i drugih nesreća Općine;
3. planira i utvrđuje izvore finansiranja za izvršavanje poslova zaštite i spašavanja iz nadležnosti Općine;
4. donosi Plan zaštite od požara Općine;
5. razmatra stanje zaštite i spašavanja na području Općine i utvrđuje mjere za razvoj i usavršavanje zaštite i spašavanja od prirodnih i drugih nesreća,
6. vrši i druge poslove u skladu sa Zakonom o zaštiti i spašavanju.

Član 9. **(Nadležnosti Općinskog načelnika)**

U ostvarivanju prava i dužnosti u oblasti zaštite i spašavanja, Općinski načelnik:

1. organizuje Operativni centar civilne zaštite i obezbjeđuje njegovo funkcionisanje;
2. donosi akte o osnivanju i funkcionisanju zaštite i spašavanja Općinskog štaba civilne zaštite;
3. donosi Procjenu ugroženosti na području Općine od prirodnih i drugih nesreća;
4. donosi Plan zaštite i spašavanja od prirodnih i drugih nesreća Općine;
5. proglašava stanje prirodne i druge nesreće i naređuje upotrebu snaga i sredstava civilne zaštite, službi za upravu, privrednih društava i drugih pravnih lica na području Općine na: prevenciji, ublažavanju i otklanjanju štetnih posljedica od prirodnih i drugih nesreća;
6. proglašava prestanak prirodne i druge nesreće na području Općine;

7. naređuje mobilizaciju građana i njihovih sredstava i sredstava pravnih lica samostalnih privrednika, državnih organa kao i jedinica, štabova, povjerenika i službi za zaštitu i spašavanje;
8. vrši i druge poslove u skladu sa Zakonom o zaštiti i spašavanju.

Član 10.

(Nadležnosti općinskog organa uprave i drugih tijela uprave)

Službe za upravljanje Općine Ilidža (u daljem tekstu: Općinski organi uprave) i druga općinska tijela uprave, u okviru svojih prava i dužnosti utvrđenih Zakonom o zaštiti i spašavanju, Statutom općine i drugim propisima u oblasti zaštite i spašavanja ljudi i materijalnih dobara od prirodnih i drugih nesreća, dužni su da:

1. organizuju, planiraju i osiguravaju provođenje preventivnih mjera za zaštitu vlastitog ljudstva, materijalnih sredstava i objekata koje koriste u svom radu;
2. učestvuju u izradi Procjene ugroženosti na teritoriji Općine, općinskog Programa i Plana u pitanjima iz oblasti za koju su osnovani i u okviru svoje djelatnosti realizuju zadatke koje se za njihove oblasti utvrde u tim dokumentima;
3. provode mjere zaštite i spašavanja ljudi i materijalnih dobara iz svoje oblasti a naročito mjere koje naredi Općinski štab koje se odnose na angažiranje službi zaštite i spašavanja, privrednih društava i drugih pravnih lica u zaštiti i spašavanju;
4. obavještava Službu civilne zaštite Općine o podacima koji su od značaja za planiranje, organiziranje i provođenje zaštite i spašavanja ljudi i materijalnih dobara iz nadležnosti Općine;
5. učestvuju u izradi elaborata za izvođenje zajedničke i samostalne vježbe zaštite i spašavanja.

Član 11.

(Nadležnosti Službe civilne zaštite)

Služba civilne zaštite iz oblasti zaštite i spašavanja obavlja sljedeće poslove:

1. organizuje, priprema i provodi zaštitu i spašavanje na području Općine;
2. izrađuje procjenu ugroženosti za područje Općine;
3. priprema program razvoja zaštite i spašavanja od prirodnih i drugih nesreća Općine;
4. predlaže plan zaštite i spašavanja od prirodnih i drugih nesreća Općine;
5. izrađuje plan zaštite od požara Općine;
6. prati stanje priprema za zaštitu i spašavanje i predlaže mjere i unapređenje organizovanja i osposobljavanja civilne zaštite;
7. organizuje, izvodi i prati realizaciju obuke građana na provođenju lične i uzajamne zaštite;
8. organizuje i koordinira provođenje mjera zaštite i spašavanja, te organizuje i provodi poslove zaštite od požara i vatrogastvo, predlaže program samostalnih vježbi i izrađuje elaborat za izvođenje vježbi civilne zaštite u Općini;
9. prati propise iz oblasti civilne zaštite i stara se o njihovoj dosljednoj primjeni;
10. organizuje općinski Operativni centar civilne zaštite i obezbjeđuje njegov rad;
11. vrši popunu ljudstvom štabova civilne zaštite, službi zaštite i spašavanja, jedinica civilne zaštite, određuje povjerenike i osigurava njihovo opremanje materijalno-tehničkim sredstvima, te organizuje, izvodi i prati realizaciju njihove obuke;
12. priprema propise u oblasti civilne zaštite iz nadležnosti općine;
13. vodi propisane evidencije i vrši druge poslove zaštite i spašavanja u skladu sa Zakonom i drugim propisima i općim aktima;

Član 12.
(Operativni centar civilne zaštite)

U sastavu Službe civilne zaštite organizuje se Operativni Centar civilne zaštite (u daljem tekstu: Operativni Centar). Operativni centar prikuplja podatke o svim vrstama pojava i opasnosti koje mogu dovesti do prirodne ili druge nesreće po ljude i materijalna dobra na ugroženom području, obrađuje te podatke i distribuira ih nadležnim organima vlasti i pravnim licima, kao i prenošenje naredbi Općinskog štaba u vrijeme njegovog funkcionisanja, vrši uzbunjivanje i upozoravanje građana, oglašava prestanak opasnosti, te pravovremeno izvještava nadležne organe.

Član 13.
(Uslovi za rad Operativnog centra civilne zaštite)

Za rad Operativnog centra Općine moraju se osigurati neophodni uslovi koji se odnose na prostor, materijalno-tehnička sredstva i opremu u skladu sa odredbama Pravilnika o organizovanju i funkcionisanju Operativnih centara civilne zaštite ("Službene novine Federacije Bosne i Hercegovine", broj 09/19) i članova 149. do 153. Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, broj 39/03, 22/06 i 43/10).

Radno vrijeme Operativnog centra je 24 sata svaki dan (24/7/365). Za taj rad u Operativnom centru mora biti zaposleno najmanje pet lica kako bi se omogućio nesmetan rad 24 sata.

Rad Operativnog centra bliže će se urediti u Planu zaštite i spašavanja od prirodnih i drugih nesreća.

Član 14.
(Mjesne zajednice)

Statutom ili pravilima mjesne zajednice uređuje se način organizovanja i ostvarivanja zaštite od prirodnih i drugih nesreća na području mjesne zajednice, utvrđuje nadležnost organa mjesne zajednice kao i način angažovanja građana u zaštiti i spašavanju.

IV STRUKTURE CIVILNE ZAŠTITE

Član 15.
(Strukture civilne zaštite)

Strukture civilne zaštite općine su:

- Općinski štab civilne zaštite,
- Povjerenici civilne zaštite,
- jedinice civilne zaštite i
- službe zaštite i spašavanja.

Član 16.
(Općinski štab civilne zaštite)

U Općini se osniva Općinski štab civilne zaštite Ilidži (u daljem tekstu: Općinski štab) kao stručno-operativni organ za rukovođenje akcijama zaštite i spašavanja svih učesnika angažiranih na zaštiti i spašavanju na području Općine.

Član 17. **(Sastav Općinskog štaba)**

Općinski štab sastoji se od: komandanta, načelnika i članova štaba koje postavlja i razrješava Općinski načelnik.

Sastav i način popune štabova civilne zaštite uređuje se posebnim općim aktom organa uprave, odnosno posebnim aktom pravnog lica.

Općinski štab vrši poslove iz svoje nadležnosti samostalno i za svoj rad je odgovoran Općinskom načelniku.

Član 18. **(Osnivanje štabova civilne zaštite pravnih lica)**

Štabovi civilne zaštite mogu se osnivati u pravnim licima koja se nalaze na području općine u skladu sa njihovim procjenama ugroženosti.

Ako se ne osnuje štab civilne zaštite, pravna lica su dužna svojim općim aktom odrediti organ koji će rukovoditi akcijama zaštite i spašavanja u pravnom licu.

U toku vođenja akcija zaštite i spašavanja ljudi i materijalnih dobara od prirodnih i drugih nesreća, pravna lica iz stava (1) ovog člana, dužna su provoditi odluke Općinskog štaba koji rukovodi akcijama zaštite i spašavanja.

Član 19. **(Osnivanje štabova civilne zaštite u mjesnim zajednicama)**

U mjesnoj zajednici se može osnovati štab civilne zaštite mjesne zajednice kao stručno operativni organ rukovođenja akcijama zaštite i spašavanja svih učesnika na zaštiti i spašavanju na području mjesne zajednice.

Član 20. **(Nadležnosti Općinskog štaba)**

U rukovođenju akcijama zaštite i spašavanja štabovi civilne zaštite vrše sljedeće poslove:

- odlučuje o upotrebi snaga i sredstava civilne zaštite na zaštiti i spašavanju ugroženih i stradalih ljudi i materijalnih dobara i te snage raspoređuju na područja koja su ugrožena;
- naređuju provođenje odgovarajućih mjera zaštite i spašavanja i određuju snage i sredstva koje će provoditi te mjere;
- usmjeravaju, koordiniraju i rukovode akcijama zaštite i spašavanja svih učesnika angažovanih na zaštiti i spašavanju;
- rješavaju sva pitanja koja se u toku provođenja aktivnosti na zaštiti i spašavanju pojave u vezi s angažovanjem snaga i sredstava civilne zaštite i provođenju mjera zaštite i samozaštite građana.

Član 21. **(Rukovođenje akcijama zaštite i spašavanja)**

Rukovođenje akcijama zaštite i spašavanja u organima uprave i drugim tijelima vlasti i pravnim licima vrše i to:

- u organima uprave i drugim organima vlasti – rukovodilac organa uprave;
- u pravnom licu – štab civilne zaštite, ako je osnovan, odnosno direktor;
- u mjesnoj zajednici – štab civilne zaštite, a ako štab nije osnovan, povjerenik civilne zaštite.

U uvjetima kada prirodna i druga nesreća zaprijeti ili nastane iznenada, a komandant nadležnog Štaba civilne zaštite nije u mogućnosti izvršavati svoje dužnosti, načelnik Štaba civilne zaštite je ovlašten da u ime komandanta poduzima sve potrebne mjere značajne za zaštitu i spašavanje, dok komandant ne počne vršiti svoju funkciju.

O poduzetim mjerama i postupcima, iz stava (2). ovog člana, načelnik štaba civilne zaštite dužan je obavijestiti komandanta štaba civilne zaštite, odmah, kada komandant počne obavljati svoju funkciju.

Član 22. **(Povjerenici civilne zaštite)**

Povjerenici civilne zaštite (u daljnjem tekstu: povjerenici) određuju se u naselju, dijelu naselja, stambenim zgradama, općinskim organima uprave i drugim organima uprave Općine, drugim organima i ustanovama i pravnim licima u kojima se ne osniva štab civilne zaštite.

U općinskim organima uprave i drugim organima i ustanovama određuje se jedan povjerenik za svaki organ, odnosno ustanovu.

Povjerenici u naseljima vrše poslove koji se odnose na organizovanje i poduzimanje neposrednih mjera na učešću građana u provođenju samozaštite i učestvuju u svim aktivnostima civilne zaštite koje se provode u akcijama zaštite i spašavanja ljudi i materijalnih dobara na određenom području, odnosno u objektima za koje su zaduženi.

Povjerenici u općinskim organima uprave i drugim organima vlasti, ustanovama i pravnim licima, vrše poslove koji se odnose na organiziranje i pripremanje mjera i aktivnosti na sudjelovanju službenika i uposlenika na provođenju lične i kolektivne zaštite i mjera zaštite i spašavanja u zgradama i objektima za koje su zaduženi.

Planom zaštite i spašavanja od prirodnih i drugih nesreća vrši se određivanje broja povjerenika civilne zaštite, razrada njihovih poslova i zadataka u miru, za vrijeme prirodnih nepogoda i drugih nesreća i način finansiranja.

U općinskim organima uprave i naseljima povjerenike postavlja i razrješava općinski načelnik na prijedlog Službe civilne zaštite Općine.

Član 23. **(Jedinice civilne zaštite)**

Jedinice civilne zaštite formiraju se, opremaju i osposobljavaju kao operativne snage radi neposrednog angažovanja na izvršavanju zadataka zaštite i spašavanja ljudi i materijalnih

dobara od prirodnih i drugih nesreća kao i otklanjanja posljedica nastalih djelovanjem tih nesreća.

Jedinice civilne zaštite formiraju se kao jedinice opće i specijalizovane namjene. Jedinice opće namjene, u pravilu, formiraju se na načelima teritorijalne popune.

Jedinice civilne zaštite mogu se formirati kao timovi, odjeljenje i vodovi.

Vrste, veličinu i broj jedinica civilne zaštite utvrđuju se na osnovu procjene ugroženosti po ljude i materijalna dobra, koje mogu nastati od prirodnih i drugih nesreća, te ljudskih, materijalnih i drugih mogućnosti kojima raspolaže Općina i pravna lica koja osnivaju te jedinice.

Član 24. (Formiranje jedinica civilne zaštite)

Jedinicu civilne zaštite opće namjene jačine voda formira općinski načelnik na prijedlog Službe civilne zaštite Općine.

Jedinice civilne zaštite specijalizirane namjene formiraju se radi izvršavanja složenijih zadataka zaštite i spašavanja čiji pripadnici pri vršenju tih poslova moraju imati stručno znanje za pravilnu upotrebu tehničkih sredstava i opreme.

Za izvršavanje poslova i zadataka iz oblasti civilne zaštite, Općina će obrazovati: Samostalni vod opće namjene i samostalni vod civilne zaštite mješovitog sastava (hitne intervencije).

Član 25. (Službe zaštite i spašavanja)

Službe zaštite i spašavanja po pravilu organizuju se u pravnim licima sa sjedištem na području općine iz oblasti: zdravstva, veterinarstva, stambenih i komunalnih poslova, vodoprivrede, šumarstva, poljoprivrede, građevinarstva, transporta, opskrbe, ugostiteljstva i vatrogastva u kojima se obavljaju djelatnosti od značaja za zaštitu i spašavanje ljudi i materijalnih dobara od prirodnih i drugih nesreća.

Službe zaštite i spašavanja vrše poslove zaštite i spašavanja po pitanjima koja proizilaze iz osnovne djelatnosti pravnog lica. Te poslove služba ostvaruje provođenjem preventivnih i operativnih mjera zaštite i spašavanja.

Preventivne mjere zaštite i spašavanja, službe zaštite i spašavanja ostvaruju provođenjem odgovarajućih mjera, postupaka i zadataka u okviru njihove redovne djelatnosti, a kojima se može uticati na sprečavanje nastanka određenih pojava i opasnosti koje mogu izazvati prirodnu ili drugu nesreću i čijim štetnim djelovanjem mogu biti ugroženi životi i zdravlje ljudi i materijalnih dobara.

Operativne mjere zaštite i spašavanja, službe zaštite i spašavanja ostvaruju provođenjem odgovarajućih mjera, postupaka i zadataka iz svoga djelokruga, od momenta angažovanja na zaštiti i spašavanju do otklanjanja nastalih posljedica, odnosno do trenutka kada se ocijeni da prestaje potreba za angažovanjem tih službi.

Općinski načelnik, na prijedlog Službe civilne zaštite, određuje pravna lica i udruženja građana u kojima će se organizovati služba zaštite i spašavanja u skladu sa Zakonom.

V PROGRAMIRANJE I PLANIRANJE

Član 26. (Planski dokumenti)

Organiziranje i provođenje zaštite i spašavanja od prirodnih i drugih nesreća na području općine Ilidža, vrši se na osnovu planskih dokumenata:

- Procjene ugroženosti područja općine Ilidža od prirodnih i drugih nesreća;
- Program razvoja zaštite i spašavanja od prirodnih i drugih nesreća Općine Ilidža;
- Plan zaštite i spašavanja od prirodnih i drugih nesreća, a u skladu sa Zakonom i drugim propisima.

Član 27. (Način izrade planskih dokumenata)

Glavni nosilac izrade planskih dokumenata iz člana 26. ove Odluke je Služba civilne zaštite Općine uz obavezno učešće i aktivnosti općinskih organa uprave i drugih organa općinske uprave.

VI OBUČAVANJE I OSPOSOBLJAVANJE

Član 28. (Subjekti obučavanja i osposobljavanja)

Radi sticanja stručnih znanja i vještina za zaštitu i spašavanje građani, pripadnici štabova, službi zaštite i spašavanja, jedinica i povjerenici civilne zaštite dužni su se obučavati i osposobljavati za izvršavanje svojih zadataka u civilnoj zaštiti.

Obučavanje građana za ličnu i uzajamnu zaštitu može se vršiti i putem sredstava masovnog informiranja (radio, TV) i na drugi pogodan način.

Pored obveze, iz stava (1) ovog člana, komandanti, načelnici i članovi štabova i komandiri jedinica civilne zaštite, rukovodioci službi zaštite i spašavanja i rukovaoci specijalnim materijalno - tehničkim sredstvima, dužni su obučavati se na specijalističkim kursevima, koji se, u pravilu, organizuju svake druge godine.

Obučavanje i osposobljavanje iz stava (1) ovog člana organizuje se po nastavnim planovima i programima koje donosi direktor Federalne uprave civilne zaštite.

Član 29. (Način obučavanja i osposobljavanja)

Obučavanje i osposobljavanje iz člana 28. ove Odluke obavlja Služba civilne zaštite Općine, a prema nastavnim planovima i programima koje donosi direktor Federalne uprave civilne zaštite u skladu sa Zakonom.

VII FINANSIRANJE

Član 30.
(Izvori finansiranja)

Zaštita i spašavanje od prirodnih i drugih nesreća na području općine Ilidža finansira se iz:

- Budžeta Općine;
- sredstva pravnih lica;
- osiguranja;
- dobrovoljnih priloga;
- međunarodne pomoći;
- i drugih izvora utvrđenih Zakonom i drugim propisima.

Član 31.
(Budžetska sredstva)

Sredstva potrebna za finansiranje obaveza za potrebe zaštite i spašavanja na području općine obezbjeđuje se svake godine u općinskom Budžetu.

Član 32.
(Finansijska sredstva potrebna za zaštitu i spašavanje u pravnim licima)

Pravna lica iz vlastitih sredstava finansiraju troškove koje se odnose na pripremanje i opremanje štabova, povjerenika i jedinica civilne zaštite koje osnivaju radi zaštite i spašavanja vlastitog ljudstva, imovine i drugih materijalnih dobara od opasnosti i djelovanja prirodnih i drugih nesreća.

VIII PRIJELAZNE I ZAVRŠNE ODREDBE

Član 33.
(Ravnopravnost spolova)

Gramatička terminologija u ovoj Odluci podrazumijeva uključivanje oba spola.

Član 34.
(Prestanak važenja ranije odluke)

Danom stupanja na snagu ove Odluke, prestaje da važi Odluka o organizovanju i funkcionisanju zaštite i spašavanja na području općine Ilidža broj: 01-02-636/09-8 od 07.04.2009. godine.

Član 35.
(Stupanje na snagu)

Ova Odluka stupa na snagu od dana objavljivanja u „Službenim novinama Kantona Sarajevo“.

Broj: _____/25
Datum, _____. godine

PREDSJEDAVAJUĆI
OPĆINSKOG VIJEĆA

Tarik Stambolić, magistar poslovnog prava

OBRAZLOŽENJE

I – ZAKONSKI OSNOV

Zakonski osnov za donošenje Odluke o organizovanju i funkcionisanju zaštite i spašavanja od prirodnih i drugih nesreća na području općine Ilidža (u daljem tekstu: Odluka), sadržan je u odredbama člana 29. tačke 1. Zakona o zaštiti i spašavanju ljudi i materijalnih dobara od prirodnih i drugih nesreća („Službene novine FBiH“, broj: 39/03, 22/06 i 43/10) i člana 28. Statuta Općine Ilidža („Službene novine Kantona Sarajevo“, broj: 33/10 i 18/16).

II – RAZLOZI ZA DONOŠENJE ODLUKE I OBRAZLOŽENJE ODABRANE POLITIKE

Donošenje Odluke zasnovano je na potrebi unapređenja važećeg normativnog okvira kojim se uređuje organizacija i funkcionisanje zaštite i spašavanja od prirodnih i drugih nesreća. Postojeća Odluka pokazala se nedovoljno preciznom što je otežavalo funkcionisanje i organizaciju zaštite i spašavanja od prirodnih i drugih nesreća.

Odabrana politika temelji se na principima zakonitosti, efikasnosti i odgovornosti, te je u skladu sa Zakonom o zaštiti i spašavanju ljudi i materijalnih dobara od prirodnih i drugih nesreća.

Donošenjem ove Odluke unapređuje se sistemska i koordinirana reakcija nadležnih organa u Općini Ilidži, a sve u cilju zaštite života, zdravlja i imovine građana.

III – NORMATIVNA STRUKTURA ODLUKE

U navedenom dijelu Prijedloga Odluke uređena je normativna struktura sadržaja članova same Odluke na sljedeći način:

Članom 1. definiše se predmet Odluke odnosno način organizovanja i funkcionisanja zaštite i spašavanja od prirodnih i drugih nesreća.

Članom 2. definišu se subjekti na koje se odnosi ova Odluka.

Članom 3. definiše se lična i uzajamna zaštita građana, koju u skladu sa zakonom sprovode svi radno sposobni građani kroz obuku, preventivne mjere i hitne intervencije na mjestima gdje žive i rade, predstavlja ključni oblik njihovog organizovanog učešća u zaštiti i spašavanju.

Članom 4. definiše se da su sva pravna lica koja obavljaju djelatnosti značajne za zaštitu i spašavanje dužna organizovati i provoditi mjere zaštite i spašavanja u skladu sa Zakonom i postupati po odlukama Općinskog štaba civilne zaštite tokom akcija spašavanja.

Članom 5. uređuje se način na osnovu kojih su pravna lica dužna provoditi pripreme, izrađivati planove, osiguravati sredstva i organizovati civilnu zaštitu, te dati prioritet komunikacijskim vezama Općinskom štabu prilikom akcija zaštite i spašavanja.

Članom 6. definišu se različite mjere zaštite i spašavanja ljudi i materijalnih dobara od prirodnih i drugih nesreća, a koje se sprovode na području općine Ilidža.

Članom 7. definišu se mjere zaštite i spašavanja koje predstavljaju organizovane preventivne i operativne aktivnosti koje organi vlasti i pravna lica planiraju i sprovode radi sprečavanja nesreća, reagovanja na neposredne opasnosti, djelovanja tokom nesreća i ublažavanja njihovih posljedica, a sve prema planovima zaštite i spašavanja.

Članom 8. definišu se nadležnosti Općinskog vijeće Ilidža, koje na prijedlog načelnika donosi ključne akte i razmatra stanje i preduzima mjere za razvoj sistema zaštite i spašavanja u skladu sa Zakonom.

Članom 9. definišu se nadležnosti Općinskog načelnika koji organizuje i rukovodi sistemom zaštite i spašavanja kroz osnivanje operativnih struktura, donošenje planskih dokumenata, proglašavanje stanja nesreće i mobilizaciju resursa, u skladu sa zakonom.

Članom 10. definišu se nadležnosti Općinskih organa za upravu i drugih općinskih tijela koja su dužna organizovati preventivne mjere, učestvovati u planiranju i provođenju zaštite i spašavanja, sarađivati sa Službom civilne zaštite i učestvovati u vježbama u skladu sa svojim nadležnostima.

Članom 11. definišu se nadležnosti Službe civilne zaštite koja organizuje, planira, koordinira i prati sve aktivnosti zaštite i spašavanja na području Općine, izrađuje procjenu ugroženosti, provodi obuku građana, organizuje upravljanje Operativnim centrom, predlaže planove i programe, te osigurava dosljednu primjenu propisa i tehničku opremljenost struktura civilne zaštite.

Članom 12. uređuje se Operativni Centar civilne zaštite koji prikuplja, obrađuje i distribuira podatke o opasnostima, prenosi naredbe Općinskog štaba, vrši uzbunjivanje građana i izvještava nadležne organe tokom akcija zaštite i spašavanja.

Članom 13. definišu se uslovi za rad, radno vrijeme i funkcionisanje Operativnog centra na osnovu člana 151. Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, broj 39/03, 22/06 i 43/10) i Pravilnika o organizovanju i funkcionisanju Operativnih centara civilne zaštite („Službene novine Federacije Bosne i Hercegovine“, broj 09/19).

Članom 14. definiše se organizacija mjesne zajednice i nadležnosti u zaštiti i spašavanju ljudi i materijalnih dobara od prirodnih i drugih nesreća.

Članom 15. definišu se strukture civilne zaštite Općine Ilidža.

Članom 16. definiše se Općinski štab civilne zaštite Ilidži kao stručno-operativni organ za rukovođenje akcijama zaštite i spašavanja.

Članom 17. uređuje se sastav Općinskog štaba civilne zaštite koji se sastoji od komandanta, načelnika i članova koje postavlja i razrješava Općinski načelnik.

Članom 18. definišu se Štabovi civilne zaštite koji se mogu osnivati u pravnim licima na području općine, a ako se ne osnuju, pravna lica su dužna odrediti organ za rukovođenje akcijama zaštite i spašavanja.

Članom 19. definiše se štab civilne zaštite koji se osniva u mjesnim zajednicama kao stručno-operativni organ za rukovođenje akcijama zaštite i spašavanja.

Članom 20. definišu se nadležnosti Općinskog Štaba civilne zaštite koji rukovodi akcijama zaštite i spašavanja.

Članom 21. definiše se rukovođenje akcijama zaštite i spašavanja u organima uprave, pravnim licima i mjesnim zajednicama koje vrše nadležni rukovodioci, štabovi civilne zaštite ili povjerenici.

Članom 22. definišu se Povjerenici civilne zaštite koji se određuju u područjima i institucijama gdje nije osnovan štab civilne zaštite i obavljaju poslove organizovanja mjera samozaštite i učestvuju u aktivnostima zaštite i spašavanja.

Članom 23. definišu se jedinice civilne zaštite koje se formiraju, opremaju i osposobljavaju kao operativne snage za neposredno izvršavanje zadataka zaštite i spašavanja.

Članom 24. definiše se način formiranja jedinica civilne zaštite opće namjene i specijalizirane namjene.

Članom 25. uređuje se način službi zaštite i spašavanja koje se organizuju u pravnim licima radi provođenja preventivnih i operativnih mjera zaštite i spašavanja ljudi i materijalnih dobara.

Članom 26. definiše se organiziranje i provođenje zaštite i spašavanja na području općine Ilidža na osnovu planskih dokumenata kao što su: procjena ugroženosti, program razvoja i plan zaštite i spašavanja.

Članom 27. definiše se glavni nosilac izrade planskih dokumenata.

Članom 28. definišu se subjekti koji vrše obučavanje i osposobljavanje za učešće u akcijama zaštite i spašavanja.

Članom 29. definiše se način obučavanje i osposobljavanje koje obavlja Služba civilne zaštite Općine prema programima koje donosi direktor Federalne uprave civilne zaštite.

Članom 30. definisani su izvori finansiranja zaštite i spašavanja od prirodnih i drugih nesreća.

Članom 31. definišu se sredstva za finansiranje zaštite i spašavanja na području općine koja se obezbjeđuju u općinskom budžetu.

Članom 32. definišu se finansijska sredstva potrebna za zaštitu i spašavanje u pravnim licima.

Članom 33. definiše se ravnopravnost spolova.

Članom 34. definisan je prestanak važenja ranije Odluke.

Članom 35. definisano je stupanje na snagu Odluke.

IV – FINANSIRANJE

Za sprovođenje ove Odluke neće biti potrebna dodatna finansijska sredstva, obzirom da se sredstva za finansiranje već obezbjeđena u općinskom budžetu.

OPĆINSKI NAČELNIK

Nermin Muzur, magistar uprave